



ARLeF: DOI GNÛFS VIDEOTUTORIALS DIDATICS PE LENGHE FURLANE

Un jutori in plui pai insegnants

A cressin il numar e la cualitât dai struments didatics a disposizion dai insegnants di lenghe furlane. Chei disvilupâts plui di resint a son **doi videotutorials fats de ARLeF** (Agenzie Regionâl pe Lenghe Furlane) par ilustrâ intal detai ai insegnants dutis lis potenzialitâts di ûs des publicazions **“Sghiribiç, sfueut didatic par imparâ a lei e a scrivi”** e **“99 Peraulis - Fevelâ cul mont - Parlare col mondo - Talking to the world”**, intal ambit de didatiche de lenghe furlane.

A son stâts presentâts intun incuintri public a Udin che si â davuelt cualchi zornade indaûr, te sede di **Docuscuele**, intal salon de Societât Filologjiche Furlane.

I videotutorials a durin dai 10 ai 14 minûts ognidun e a son in lenghe furlane, sottitulâts par talian. A comentâju e je Silvana Schiavi Fachin, ideadore di “Sghiribiç” e autore de scjate zûc “99 Peraulis”. Esperte di educazion plurilengâl e di formazion dai insegnants.

“Sghiribiç” al è stât fat de catidre di Didatiche des lenghis modernis de Universitât dal Friûl, di une idee de professore Schiavi, cu la colaborazion di Alessandra Burelli e di Giancarlo Velliscig, cu la consulence scientifiche dal professôr Nereo Perini, e

cui dissens di Renato Calligaro. Finanziât de Comission des Comunitâts Europeanis, al è stât publicât di KappaVu Edizioni in 6 numars. Al è un gjornalin studiât par insegnâ a lei e a scrivi par furlan ai fruts de scuele de infanzie e primarie. Il videotutorial al



ilustre modei di ûs concret di chestis schedis là che, par esempi, al ven presentât il sisteme vocalic furlan e chel talian fasint vignî fûr lis diferencis sot forme di zûc.

“99 Peraulis”, al è stât fat de ARLeF in colaborazion cu la cjase editore Futura di S. Vit dal Tiliment. La publicazion si compon di une scjate cun 99 cjartis di zûc, caraterizadis di dissens e di tescj di complessitât progressive, che a acompagnin la cressite des competencis dai students de scuele de infanzie fin ae primarie. Lis lenghis plui dopradis intes cjartis a son il furlan e il talian, ma in bande di chestis a ’nd è altris 13. Il videotutorial al ilustre esempiis pratics su cemût che i insegnants a puedin doprâ cheste scjate pal zûc pe didatiche, daûr de fasse di etât dai arlefs, stimolant i fruts intal lôr percors di aprendiment. L’obietif al è chel di fâur scuvierzi lis analogjiis e lis diferencis esistentis tra lis diversis visions dal mont, metint in zûc la lôr esperience personâl.



I videotutorials e i materiâi didatics di riferiment a saran a disposizion sul sît de ARLeF www.arlef.it te sezion video e ancje sul sît di Docuscuele www.scudefurlane.it.